

BATIZMU NA'I NIAN

Tema Festa Batizmu Na'i nian

Iha Jezús nia batizmu iha mota Jordão, Maromak revela nia Oan-Mane doben, ne'ebé Nia haruka mai mundu ho misaun atu salva no liberta ema sira. Hodi kumpre Aman nia projetu, Nia sai ida hanesan ita, fahe ita-nia fragilidade no humanidade, liberta ita husi egoizmu no salan no empeña An atu promove ita, atu ita bele to'o ba moris iha plenitude.

Leitura dahuluk haklaken “Atan” misteriozu ida, Maromak hili no haruka ba ema sira atu lori justisa no dame rohan-laek... Ho Espíritu Maromak nian, nia sei konkretiza ho haraik-an no simplisidade, hodi la uza poder, impozisaun, prepotência, tanba buat sira-ne'e la tama iha Maromak nia eskema sira.

Iha *Evanjellu*, mosu konkretizasaun promesa profética: Jezús mak “Oan-Mane/Atan” ne'ebé Aman haruka, no iha Nia Espíritu horik bá no Ninia misaun mak realiza ema sira nia libertasaun. Hodi obedese ba Aman, Nia sai ema, identifika An ho ema sira nia fragilidade, la'o iha sira nia sorin, atu promove sira no lori ba rekonsiliaun ho Maromak, ba moris nakonu.

Leitura daruak afirma fali katak Jezús mak Aman nia Oan-Mane doben ne'ebé Nia haruka mai mundu atu konkretiza projetu salvasaun nian; tanba Nia “la'o iha mundu hodi halo di'ak” no liberta ema sira ne'ebé iha opresaun. Ne'e sasin ne'ebé eskolante sira tenke fô, atu salvasaun ne'ebé Maromak oferese to'o ba povu hotu rai nian.

LEITURA I – Is 42,1-4.6-7

Ita-nia testu pertense ba “Livru Konsolasaun” Deutero-Isaías nian (kf. Is 40-55). “Deutero-Isaías” mak naran konvensionál ne'ebé biblista sira fô ba profeta anónimu eskola Isaías nian, ne'ebé kumpre nia misaun profética iha Babilónia, entre judeu sira iha ezíliu. Ita iha finál Éziliu nian, entre 550 no 539 mK no judeu sira frustradu no lakon dalan, maski profeta Ezequiel promete libertasaun ne'ebé sei mai lalais.

Deutero-Isaías mak mensajen atu konsola sira. Nia haklaken libertasaun no kompara sira-nia saida husi Babilónia hanesan ézodu antigu, husi Ejitu (kf. Is 40-48); hafoin, haklaken rekonstrusaun Jerusalém nian, sidade ne'ebé funu harahun tiha ba akudesan, maibé Maromak sei lori fali ba nia ksolok no dame rohan laek (kf. Is 49-55).

Testu ne'ebé ohin propoin mak parte husi knananuk dahuluk “Atan’ nian (kf. Is 42,1-9). Posivel katak personajen knananuk dahuluk nian refere ba Ciro, liurai Pérsia nian, ema ne'ebé Maromak konfia ninia Povu nia libertasaun.

MENSAJEM

Ita-nia testu fahe ba parte rua; parte hotu afirma “Atan” nia eleisaun no ninia misaun. Maski nune'e parte uluk dezenvolve liu aspetu bolun nian; parte daruak define di'ak liután kestaun misaun nian.

Iha primeira parte (vers. 1-4), afirma katak “Atan” mak “eleitu” ida (“behir”) Maromak nian, katak ema ida ne'ebé Maromak “hili” eh fihir (“bahar”) husi ema barak, ba funsaun eh misaun espesiál ida (kf. Nm 16,5,7; 17,20; Dt 4,37; 7,6,7; 10,15; 14,2; 18,5; 21,5; 1 Sm 2,28;

10,24; 2 Sm 6,21; 1 Re 3,8; etc.). Ita iha kontestu “eleisaun” nian, katak kontesru iha ne’ebé Maromak destaka ema ida husi ema barak ba Ninia servisu.

“Atan” nia “ordenasaun” realiza liuhusi don Espíritu (“ruah”) nian, ne’ebé haraik ba “Atan” kbiit Jahwéh nian, kapasidade atu lori misaun to’o rohan: Espíritu ne’e mak ida ne’ebé Maromak haraik na xefe karizmátiku sira Maromak nia Povu nian (kf. Jz 33,10; 1 Sm 9,17; 16,12-13). Hodi Espíritu ne’e nia kbiit, “Atan” sei lori “justisa (‘mishpat’) ba nasaun sira”: misaun ida iha ámbitu universál, konsiste implementasaun desizaun justa iha tribunál sira, baze ba orden sosiál ne’ebé la’o ho Maromak nia eskema no projetu sira. Implementasaun ba “orden foun” ne’e la halaho hodi uza forsa, violénsia, espetákulum maibé ho laran-di’ak, laran-maus, simplisidade ne’ebé define Maromak nia lójika. Liuliu, “Atan” sei atua ho simplisidade, hosi la impoin no hodi la dezanima hasoru difikuldade sira iha misaun.

Iha segunda parte (vers. 6-7), hahú hodi afirma katak Na’i bolu “Atan”, hafoin haktuir kedas ba bolun ne’e nia finalidade: lori “justisa” (“tzedeq”) – katak “Atan” nia misaun mak lori orden sosiál loos. Maromak konvida “Atan” atu sia “naroman nasaun sira-nian” no, iha konkretu, loke matan-delek sira nia matan, hasai dadur sira husi prizaun no sira ne’ebé hela iha nakukun laran. Tanba ne’e, ida-ne’e mak misaun libertasaun no salvasaun nian.

Iha parte rua sai klaru katak “Atan” mak instrumentu ida atu Maromak atua iha mundu atu lori salvasaun ba ema sira: Maromak hili nia husi ema barak nia leet no konfia misaun ida – lori justisa, propoin ba nasaun hotu orden sosiál foun iha ne’ebé sei halakon nakukun sira ne’ebé impede atu ema la’o no ofereba em ahotu liberdade no dame. Maromak la’ós de’it iha orijen (hilin, bolun no mandatu), maibé sei akompaña “Atan” atu konkretiza misaun nia realizasaun: atu hala’o misaun nia sei hetan tulun husi Espíritu Maromak nian, ne’ebé sei haraik kbiit atu asume misaun no halo sai konkretu.

LEITURA II – Apostólu sira nia Hahalok 10,34-38

“Apóstolu sira-nia hahlok” mak katekeze ida kona-ba “etapa Kreda” nian, katak forma oinsá eskolante sira asume no kontinua projetu salvasaun Aman Maromak nian – no oinsá lori ba mundu tomak, bainhira Jezús husik ona mundu ne’e.

Livru fahe ba parte rua. Ida dahuluk (kf. Apost 1-12), reflesaun apresenta mai ita Evanjellu nia difuzaun iha Palestina nia laran, liuhsui Pedro no Apóstolu na’in Sanulu-resin-rua nia hahalok; ida daruak (kf. Apost 13-28) apresenta mai ita Evanjellu nia espansaun iha Palestina nia li’ur (to’o Roma), liuliu hodi Paulo ninia hahalok.

Ita-nia testu ohin integra iha parte dahuluk “Apóstolu sira-nia hahalok” nian. Iha ne’ebá haktuir Pedro nia atividade misionária iha rai-tetuk Sharon nian (kf. Apost 9,32-11,18). Testu propoin mai ita sasin no katekeze Pedro nian iha Cesareia, iha senturiaun romanu nia Cornélio nia uma. Espíritu mak bolu nia (kf. Act 10,19-20), nune’e Pedro tama iha Cornélio nia uma, hato’o ba nia buat esensiál fiar nian no sarani nia, nune’e mós nia uma-laran tomak (kf. Apost 10,23b-48). Epizódiu ne’e importante tanba Cornélio mak ema jentiu dahuluk atu tama iha kristianizmu liuhusi Apóstolu ida husi na’in Sanulu-resin-rua nia haklaken no sasin: signifika katak moris foun mai husi Jezús no lori ba ema hotu laho disitinsaun.

MENSAJEN

Iha ninia diskursu, Pedro hahú hodi rekoñese katak proposta salvasaun nian ne’ebé Maromak ofereba no Kristu lori mai mak proposta universál no destina ba ema hotu, laho distinsaun (vers. 34-36). Israel mak loloos resetór privilejiadu dahuluk Maromak nia Liafuan nian; maibé Kristu lori “liafoun di’ak dame nian” (salvasaun) ba ema hotu; no agora, hodi sasin

sira Jezús nian, proposta salvasaun ne'ebé Aman halo to'o ba povu hotu ne'ebé pratika justisa – ba mane no feto hotu, lahó distinsaun rasa, kór, estatutu sosiál, ba sira ne'ebé aseita no adere ba Jezús ni a proposta.

Hafoin, Pedro apresenta rezumu ida fiar primitiva nian (vers. 37-38), katak atua misaun fundamentál eskolante sira-nian: haklaken Jezús no fó sasik kona-ba salvasaun ne'ebé tenke to'o ba ema sira. Leitura ne'ebé propoin mai ita konserva de'it parte inisiál “kerigma” primitivu nian no rezume Jezús nia atividade nu'udar “la'o iha mundu hodi halo di'ak no fó isni di'ak ba sira hotu ne'ebé diabu hanehan, tanba Maromak horik ho Nia” (vers. 38). Pedro ni akatekeze kontinua ho Jezús nia mate (vers. 39), nia moris-hi'as (vers. 40) no dimensaun salvasaun Jezús nia moris nian (vers. 43) maski la fó sai iha leitura ne'e.

EVANJELLU – Mt 3,13-17

Evanjellu domingu ne'e nian apresenta Jezús bá hasoru João Batista no simu batizmu husi nia iha mota Jordão.

João mak gia karismátiku movimentu populár ida, ne'ebé haklaken katak “Maromak nia juizu” besik ona”. Ninia mensajen nia sentru mak konversaun no inklui ritu ida purifikasaun nian ho bee – ne'ebé frekuente iha grupu ruma judeu sira nian iha tempu ne'ebá nian. Iha João nia perspetiva, ema sira tenke arrepende; no atu bolu sira ba arrependimentu mak nia sarani sira iha bee. Iha João nia perspetiva, rekuza konversaun signifika atu husik Maromak nia hirus harahun sira hanesan du'ut ne'ebé ahi han.

Tanba sá mak Jezús mós tenke apresenta an ba João atu simu “batizmu” purifikasaun, arrependimentu no perdaun salan sira-nian?

MENSAJEN

Ba Mateus, batizmu mak momentu privilegiadu ida manifestasaun Jezús nian ba ema sira: molok hahú atividade, Jezús define An, apresenta An... Pasajen ne'e iha parte rua: diálogo entre João no Jezús (vers. 14-15) no Jezús nia manifestasaun nu'udar Maromak nia Oan (vers. 16-17).

Diálogo entre João no Jezús (vers. 14-15) esplika tanba sá Jezús ba hasoru João atu simu batizmu... Husi Jezús nia resposta, sai klaru katak ne'e mak ain-hakat ida ne'ebé presiza halo atu kumpre Maromak nia projetu salvasaun nian (“ita presiza kumpre justisa hotu”... Kumpre “justisa” iha kontestu Mateus nian signifika kumpre Maromak nia hakaran – kf. Mt 5,6.10.20;6,1.33;21,32). Halo nune'e, Jezús apresenta An, nu'udar “Oan”, ne'ebé kumpre didi'ak no tuir loloos Aman nia hakaran (iha kultura semita, obediénsia mak define relasaun entre oan no aman... Ba oan ida, “kumpre justisa” iha relasaun ho Aman, mak obedese ho modu inkondisionál).

Hodi simu batizmu peniténsia no perdaun salan sira-nian (ne'ebé Nia la presiza tanba Nia la halo salan), Jezús sai solidáriu ho ema nakonu ho limitasaun no sla-na'in, asume ema nia kondisaun, hamriik iha ema sira nia sorin atu tulun sira sai husi situasaun ne'e no la'o ho sira iha dalan libertasaun nian, dalan moris nakonu nian. Ne'e mak Aman nia projetu, ne'ebé Jezús kumpre ho modu integrál.

Iha segunda parte (vers. 16-17), ita iha reflesaun ida kona-ba Jezús nia identidade no misaun. Mateus uza elementu simbóliku tolu espresivu tebes: lalehan nakloke, Espíritu ne'ebé tuun iha forma manu-falur nian no lian husi lalehan.

Lalehan nakloke signifika uniaun lalehan ho rai nian. Imajen ne'e karik hetan inspirasaun husi Is 63,19, iha-ne'ebé profeta husu ba Maromak atu “loke lalehan” no tuun mai hasoru Nia

Povu, hodi hadi'ak relasaun ne'ebé salan sobu. Nune'e, Mateus haklaken katak Jezús nia atividade mak rekonsilia lalehan ho rai, hadi'ak komuñau entre Maromak no ema sira.

Símbolu manu-falur nian ladún klaru... Karik liga ho manu-falur ne'ebé Noé liberta no filafali ba roo (kf. Gn 8,8-12); buat ne'ebé provavel liu (iha tradisaun judaika ruma, manu-falur mak símbolu Maromak nia Espíritu ne'ebé hela iha bee leten – kf. Gn 1,2) mak fó hanoin kona-ba kriaun foun ne'ebé sei hahú ho Jezús nia atividade.

Iksunian, ita iha lian husi lalehan. Ne'e mak forma ida ne'ebé rabbi sira uza maka'as atu espresa Maromak nia opiniaun kona-ba ema eh akontesimentu ida. Lian ne'e deklara katak Jezús mak Maromak nia Oan; no halo ho fórmula ida foti husi knananuk “Atan Jahwéh nian” ne'ebé ita haree iha leitura dahuluk ohin nian (kf. Is 42,1)... Ida-ne'e atu hateten katak Jezús mak Maromak nia Oan... Maibé klarifika kedas katak ninia misaun la hala'o iha triunfalizmu, maibé iha obediénsia totál ba Aman; nia sei la kumpre misaun iha poder no prepoténsia, maibé iha laran-maus, iha simplisidade, iha respeito ba ema sira (“nia sei la hakilar, la foti lian; la harahun fafulu, la hamate ahi ne'ebé sei lakan” – Is 42,2-3).

Jezús nia batizmu fó sai katak Nia mak Maromak nia Oan, ne'ebé Aman haruka mai mundu atu kumpre projetu libertasaun nian ba ema sira nia salvasaun. Nu'udar Oan loloos, Nia obedese Aman no kumpre Aman nia planu salvasaun nian; tanba ne'e mak Nia bá hasoru ema sira, sai solidáriu ho sira, asume sira-nia fragilidade, la'o ho sira, hadi'ak komuñau entre Maromak no ema sira ne'ebé salan estraga no lori ema sira ba hasoru moris iha plenitude. Husi Ninia atividade, Maromak nia oan kumpre Aman nia hakaran, hodi lori kriasuan foun, humanidade foun.

Aleinde katekese kona-ba Jezús, Maromak nia Oan, testu fó hanoin kona-ba liña importante rua seluk kona-ba definisaun Jezús nia identidade. Iha sira-ne'e ida apresenta Jezús nu'udar libertadór foun: Jezús nia batizmu iha Jordão fó hanoin kona-ba pasjen Tasi Mean no halo paralelu entre Jezús no Moisés... Jezús mak Moisés foun, hatais ho Maromak nia Espíritu, atu lori Povu husi rai eskravidaun ba rai liberdade nian. Iha liña seluk iha diálogu entre João no Jezús: se João rekoñese ho haraik-an ninia inferioridade no ninia kondisaun nu'udar prekursor, ne'e tanba Jezús mak Mesias ne'ebé ema hein, husi David nia uma-kain.